

ՎԵՐԱՊԱՏՐԱՍՏՈՂ  
ԿԱԶՄԱԿԵՐՊՈՒԹՅՈՒՆ  
ՇՈՒՄ Գիտակրթական կենտրոն ՀԿ

Ավարտական  
Հետազոտական աշխատանք

Թեմա

Պատմվածքի ուսումնասիրման

Առանձնահատկությունները երկրորդ դասարանում

Կատարող

Համեստուհի Ռոլանդի Սարգսյան

Ջաջուրի միջնակարգ դպրոցՊՈԱԿ, դասվար

Ղեկավար՝ Սիրվարդ Թամազյան

## ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ.....	3
1. ՊԱՏՄՎԱԾՔԻ ՈՒՍՈՒՄՆԱՍԻՐՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ .....	5
2. ՊԱՏՄՎԱԾՔԻ ՈՒՍՈՒՄՆԱՍԻՐՄԱՆ ՄԵՐ ՓՈՐՁԻՑ.....	11
ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ.....	17

## ՆԵՐԱԾՈՒԹՅՈՒՆ

Կրթության բարենպաստ միջավայրի աստեղծման անհրաժեշտությունը պահանջում է ուսուցման ավանդական ձևերի ու մոտեցումների վերանայում և հանրակրթական ուսումնական հաստատությունների նկատմամբ վերաբերմունքի նորովի ճշգրտում:

Հայաստանի Հանրապետության ազգային դպրոցը, որը հսկայական նվաճումներ ունի կրթության և դաստիարակության համակրգում, ներառված է կրթական բարեփոխումների դժվարին գործընթացի մեջ, որը նպատակաուղղված է մի կողմից ընդհանուր հասարակական կրթության հիմնախնդիրների լուծմանը, մյուս կողմից՝ ազգային կրթության առանձնահատկությունների զարգացմանը, ազգային արժեքների գնահատմանն ու պահպանմանը:

Այս դեպքում կարևորվում է այն հանգամանքը, որ կրթությունը անհատի, հասարակության և պետության շահից բխող ուսուցման և դաստիարակության միասնական գործընթաց է, որը նպատակաուղղված է հայ ժողովրդի և մարդկության հոգևոր ժառանգությունը, գիտելիքներն ու փորձը յուրացնելուն, պահպանելուն և սերունդներին փոխանցելուն:

«Մայրենի 2» դասագրքերի ընթերցանության նյութերի (պատմվածքների) միջոցով աշակերտները ոչ միայն սովորում են կարդալ, հասկանալ կարդացածը և վերարտադրել (պատմել), այլև դրանց բովանդակությունը հնարավորություն է ընձեռում գիտելիքներ ձեռք բերել մայրենիի, ազգային արժեքային հասկացությունների՝ ընտանիքի, ընկերասիրության, հայրենասիրության, բարեկիրթ հաղորդակցության, ազնվության, Հայաստանի, նրա քաղաքների, բնության, հայ ժողովրդի պատմության, սովորույթների, մշակույթի մասին: Միաժամանակ պատմվածքի ուսումնասիրման միջոցով երեխաները ձեռք են բերում աշխարհաճանաչողական և լեզվական գիտելիքներ, անձնային բարձրարժեք որակներ. զարգանում է նրանց գրական, գեղագիտական ճաշակը, ձևավորվում է լեզվամտածողությունը:

Գեղարվեստական ստեղծագործությունների հերոսների արարքների, դատողությունների ձգտումների, արժեքների, ճիշտ վերլուծությունը կրտսեր դպրոցականների մեջ որոշակի բարոյական արժեքների ձևավորման, տրամաբանական հետևությունների հանգեցնելու անփոխարինելի միջոց են:

Ներկայացրած ավարտական աշխատանքի նպատակն է ուսումնասիրել տարրական դպրոցի ուսումնական գործընթացի խնդիրներն ու առանձնահատկությունները, այդ հիմնապատկերի վրա դիտարկել պատմվածքի ուսումնասիրումը երկրորդ դասարանում, վեր հանել դասագործընթացի ուժեղ և թույլ կողմերը, վարել մի շարք հեղինակային դասեր՝ փորձելով աշակերտների մոտ ձևավորել մի շարք որակներ: Նպատակներն իրագործելու հանար մեր առջև դրել ենք որոշակի խնդիրներ, որոնցից կարևորագույնն են՝

- ձևավորել կարդացածը հասկանալու կարողություն,
- զարգացնել սովորողների մտածողությունը և երևակայությունը,
- հարստացնել բառապաշարը նորածանոթ բառերով,
- ձևավորել հերոսների արարքների, նրանց վարքագծի գնահատման կարողություններ,
- դերերով, երկխոսություններով և խաղերով կարդացածը հասկանալու կարողության զարգացում,
- ձևավորել սեփական կարծիքներ կազմելու հմտություններ,
- զարգացնել սովորողների բանավիճելու կարողությունները,
- հաղթահարել պատմվածքի ուսումնասիրման ժամանակ առաջացած դժվարությունները:

Ուսումնասիրության համար գիտամեթոդական հիմք են ծառայել հայրենական մեթոդիստների՝ Ա. Տեր-Գրիգորյանի, Ջ. Գյուլամիրյանի հայոց լեզվի մեթոդիկաները,

«Մայրենի 2» դասագրքերի մեթոդական ուղեցույցները:

Հետազոտության տարբեր փուլերում կիրառվել են ուսուցման տարբեր մեթոդներ, հնարներ, մոտեցումներ՝ կրտսեր դպրոցում դասալսումներ, մայրենիի դասերի և դասագրքերի վերլուծություն, զրույց, դիտում, խմբային աշխատանք և այլն:

## ԳԼՈՒԽ ԱՌԱՋԻՆ :

### ՊԱՏՄՎԱԾՔԻ ՈՒՍՈՒՄՆԱՍԻՐՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ

Պատմվածքի ուսումնասիրման խնդիրն է զարգացնել ոչ միայն երեխաների մտածողությունը, տրամաբանությունը, այլև նրանց առջև դնել մշտական գործունեության պլաններ և աշակերտների միտքը զբաղեցնել հասարակական օգտակար աշխատանքով: Մտածողությունը բնականոն երևույթ է, որը հատուկ է երեխային իր ձևավորման վաղ շրջանից և գործունեության մեջ անընդհատ զարգանալով՝ կատարելագործվում է: Երեխայի գործունեության տեսակները սերտորեն շաղկապված են և փոխադարձաբար լրացնում են միմյանց: Հատկապես նախադպրոցական և կրտսեր դպրոցական տարիքում մանկական մտածողությունն ակտիվ կերպով զարգանում է խաղի միջոցով: Խաղը նրա մեջ բորբոքում է հետաքրքրություն, հարցասիրություն, նոր տպավորություններ է առաջացնում և նպաստում նրանց ներդաշնակ զարգացմանը:

Մայրենիի ժամանակակից դասի համատեքստում էական նշանակություն է ձեռք բերում պատմվածքի ուսումնասիրումը: Նշելի է, որ պատմվածքը դասվում է գեղարվեստական ստեղծագործությունների շարքին: Այն գրականության ժանրերից է և փոքր ծավալի արձակ ստեղծագործություն է: Եթե պատմվածքը համեմատենք վիպակի հետ, ապա այստեղ դեպքերի նկարագրությունը շատ սեղմ է ու հակիրճ: Գործողությունները սահմանափակ են, դեպքերը զարգանում են ավելի սովորական, հանդարտ ընթացքով: Պատմվածքում հեղինակը երբեմն շեղումներ է կատարում, պատկերում է բնության տեսարաններ, հոգեվիճակներ, այն իր լուծումները ստանում է ավելի սովորական ձևով: Պատմվածքը պատկանում է «փոքր էպիկական ձևին»: Պատմվածքն իր արմատներով կապվում է նաև բանահյուսության հետ, որտեղից էլ գալիս են նրա հիմնական առանձնահատկությունները՝ վիպելու և պատմելու հատկանիշը: Բարձրարժեք պատմվածքում արտացոլվում են կյանքի էական կողմերը, կատարվում են ընդհանրացումներ, կերտվում գեղարվեստական կերպարներ:

Տարրական դասարանների դասագրքերում հիմնականում զետեղված են իրապատում պատմվածքներ կամ պատմություններ, որոնք գրվում են այդ տարիքային խմբի երեխաներին:

Պատմվածքի ուսումնասիրման գործընթացում պետք է կարևորել ոչ միայն նրա

գեղարվեստական արժեքը, այլև ճանաչողական և դաստիարակչական հնարավորությունները: Պատմվածքի ուսումնասիրումը իրականացվում է բացատրական ընթերցանության մեթոդի բաղադրամասերով:

Մեր ուսումնասիրությունները ցույց են տալիս, որ կրտսեր դպրոցականներն ավելի հեշտ են ընկալում պարզ կառուցվածքով, քիչ հերոսներով և մատչելի գաղափարներով ստեղծագործությունները: Իսկ այն պատմվածքները, որոնք ունեն բարդ իմաստ, այսինքն՝ իմաստային առումով ավելի բարդ ընկալելի են երեխաների համար, ավելի դժվարությամբ են յուրացվում:

Որպեսզի պատմվածքն ավելի հասանելի լինի և հասկանալի, ճիշտ ուսումնասիրվի սովորողների կողմից, հարկավոր է, որ ուսուցիչը նախօրոք պլանավորի և լրջորեն նախապատրաստվի դասին: Ուսուցիչը պետք է լավ իմանա պատմվածքի յուրաքանչյուր պարբերությունը, նախադասությունն ու բառը: Առանց նախապատրաստվելու նույնիսկ փորձառու ուսուցիչը չի կարող անթերի կատարել գեղեցիկ ընթերցումը: Լավ կարդացող ուսուցիչը երեխայի մեջ հետաքրքրություն է առաջացնում դեպի գեղարվեստական ստեղծագործությունը:

Սկզբնական փուլում ուսուցիչը սկսում է նախապատրաստական գրույցից և նախապատրաստական աշխատանքներից: Ինչպես նշվեց, աշակերտի ընթերցման գեղեցիկ օրինակ է ուսուցիչը, ուստի այդ է պատճառը, որ 2-րդ դասարանի 1-ին կիսամյակում ուսուցիչը հենց ինքը պետք է կարդա պատմվածքի բնագիրը, իսկ լավ կարդացող աշակերտների առկայության դեպքում կարելի է վստահել նրանց:

Պատմվածքի առաջին ընթերցման նախապատրաստելու ուղղությամբ կատարվող աշխատանքները կարող են լինել տարաբնույթ, սակայն դրանց ընդհանուր նպատակը նույնն է. բոլոր երեխաներին ներգրավել թեմայի մեջ և հոգեբանորեն նախապատրաստել ընթերցածը ճիշտ և խորը յուրացնելու համար: Նախապատրաստական աշխատանքները կատարելուց հետո գալիս է ամբողջական ընթերցումը, որի ընթացքում ուսուցիչը, իր ուշադրությունն ուղղելով գեղեցիկ ընթերցանությանը, մի կողմ պետք է թողնի բնագրում եղած առանձին մտքերի ու բառերի բացատրությունը: Բառաբացատրությունը ուսուցիչը տալիս է պատմվածքը կարդալուց հետո: Շահեկան է, որ ուսուցչի կարդալուց հետո բնագիրը կարդան երեխաները մտքում կամ շշուկով. սա ևս նպաստում է նյութի հասկացմանն ու ընկալմանը: Կան երեխաներ, որոնք մինչև իրենք չկարդան, չեն կարող հասկանալ

կարդացածը:

Բնագրի ամբողջական ընթերցումից հետո տրվում է բնագրի ընթերցումը մասերով: Ընթերցանության այս տեսակն իրականացնում են աշակերտները, իսկ ուսուցիչն այդ գործընթացի կազմակերպիչն է, ուղղորդողը:

Ինչպես գիտենք, դասարաններում կան տարբեր ունակություններ և առանձնահատկություններ ունեցող երեխաներ: Ուսուցչի խնդիրն է ներգրավել բոլոր երեխաներին, դիտարկել և գնահատել նրանց արժեքային համակարգը և մասնակից դարձնել դասագործընթացին:

Պատմվածքի ուսումնասիրման մյուս փուլը կոչվում է աշխատանք բնագրի շուրջ: Երբ երեխաները կարդում և վերջացնում են բնագիրը մասերով, գրույցի և հարցերի միջոցով նրանք ոչ միայն ըմբռնում են ստեղծագործության մեջ նկարագրված դեպքերը, տրամաբանությունն ու հաջորդականությունը, այլև հասկանում են կարդացածը, կատարում պարզ դիտարկումներ, մեկնաբանություններ և համեմատություններ:

Ուսուցիչը երեխաների հետ միասին հարցերի միջոցով բացահայտում է հերոսների բացասական և դրական գծերը՝ միաժամանակ լուծելով դաստիարակչական մի շարք խնդիրներ: Այս ամենն օգնում է երեխաներին նախապատրաստվել բնագրի պատմելուն: Բնագրի պատմելու ժամանակ ուսուցիչը չպետք է կադապարի աշակերտին, որովհետև կլինեն աշակերտներ, որոնք սիրում են ստեղծագործել և դասը կարող են պատմել օգտագործելով իրենց մտքի թռիչքը:

Տարրական դպրոցի ուսուցիչը պետք է խուսափի այն հարցադրումներից, որոնք կանխում են աշակերտի ինքնուրույն մտածողությունը; Պատմվածքի ուսումնասիրումը ոչ միայն պետք է նպաստի երեխաների կարդալու կարողության զարգացմանը, այլև նրանց մեջ ձևավորի երևակայելու, պատկերացնելու, քննարկելու ունակություններ:

Դասի հաջորդ փուլը պատմվածքի բովանդակության վերարտադրումն է կամ պատմումը: Երեխաները հանձնարարություն են ստանում, որ դասը բացի լավ կարդալ կարողանալուց, նաև կարողանան կարդալ դերերով, այնուհետև կարող են փոքրիկ բեմականացում կազմակերպել՝ ելնելով բնագրից:

Այսպես՝ ուսումնասիրենք երկրորդ դասարանի դասագրքում գետեղված «Մայրիկի ծաղիկը» փոքրիկ պատմվածքը: Ուսուցիչը հանձնարարում է մեկին լինել

հեղինակը, մյուսին՝ Արփենիկը, մեկ ուրիշին՝ մայրիկը. ընտրում են չորս ծաղիկներ և թիթեռներ: Այնուհետև իրականացնում են բեմականացումը: Կարելի է նաև երեխաների գլխին դնել ծաղիկներ՝ դեղին, կարմիր, կապույտ, սպիտակ, և վրան փակցնել իր գույնի թիթեռ: Հիմնականում այն կախված է ուսուցչի (նաև աշակերտների) երևակայությունից, թե ինչպես ավելի հասկանալի և հետաքրքիր դարձնել պատմվածքի ուսումնասիրումը:

Վերջում կատարվում է բնագրի ամփոփում հարցերի միջոցով:

1. Ինչո՞ւ Արփենիկը գնաց դաշտ:
2. Ինչո՞ւ Արփենիկը ծաղիկ չքաղեց;
3. Ի՞նչ էք կարծում՝ թիթեռնիկներն իրոք ապրում են ծաղիկների վրա:
4. Մայրիկն ուրախացա՞վ, թե՞ տխրեց. ինչո՞ւ:
5. Ուրիշ ի՞նչ կարող է նվիրել Արփենիկը մայրիկին:
6. Դուք ի՞նչ էք նվիրում մայրիկին նրա ծննդյան օրվա առթիվ:

Նշելի է, որ տարրական դասարաններում՝ սկսած երկրորդ դասարանից, դասի ամփոփման ժամանակ որպես գրական տարրական գիտելիքներ որոշ տեղեկություններ պետք է տալ նաև պատմվածքի հեղինակի մասին:

Պատմվածքի ուսումնասիրման ընթացքում ուսուցիչը կարող է կիրառել խաղային միջոցներ: Խաղի ընթացքում երեխան սովորում է նոր բառեր, անուններ, քերականական պարզ կանոններ, օրնեքներ, դատողություններ է անում, մտահանգումներ կատարում: Երբ պատմվածքը ողողված է լինում խաղի տարրերով, ապա այն զարգացնում է սովորողի ստեղծագործական կարողությունները, նրան պատճառում հոգեկան բավականություն:

Կրտսեր դպրոցականը, ինչ խոսք, ունի զարգացման բնախոսական, կազմախոսական, տարիքային և այլ շատ առանձնահատկություններ: Փորձենք նկարագրել կրտսեր դպրոցականի իմացական գործընթացները:

Երեխաները ծնվում են թույլ զարգացած, բայց անհրաժեշտ բոլոր զգայարաններով: Միջավայրի, ժառանգական նախադրյալների, դաստիարակության, ուսուցման և արտաքին ազդեցությունների ներգործությամբ աստիճանաբար ձևավորվելով՝ երեխաները ձեռք են բերում ինքնուրույնություն, անհատականություն, ձևավորվում է նրանց անձնավորությունը, անհատականությունը: Պատմվածքը կարող է ձևավորվել հատուկ բնավորություն, խառնվածք, հակումներ և



հետաքրքրություններ, ձգտումներ ու ցանկություններ: Պատմվածքը զարգացնում է մտավոր կարողությունները, լեզվական ունակությունները, հոգեկան հատկությունները: Կրտսեր դպրոցականն օժտված է տրամաբանական մտածողությամբ, սակայն չպետք է գերազնահատել կրտսեր դպրոցականի մտավոր կարողությունները և ավելորդ ծանրաբեռնել նրան: Անշուշտ, տարրական դասարաններում աշակերտներին անհրաժեշտ է տալ ժամանակի պահանջներին համապատասխան հարուստ բովանդակության վերացարկված և ընդհանրացված գիտելիքներ, այնպես ուսուցանել, որ երեխաները կարողանան յուրացնել այդ ամենը:

«Որպեսզի տարրական դասարաններում յուրացվեն գիտելիքներ,- գրում է Վ. Ա. Կրուտեցկին,- կրտսեր դպրոցականը պետք է տիրապետի համեմատաբար բարձր զարգացած դիտողականության, կամաձին հիշողության, կազմակերպված ուշադրության, վերլուծելու, ընդհանրացնելու, դատելու կարողության»<sup>1</sup>:

Կրտսեր դպրոցականի ուղեղը տպավորվող է և արագությամբ կլանում է ամեն մի նյութ: Ինչպես նկատում է Ֆ. Գոնոբոլինը, «Շրջապատող իրականության մեջ շատ բան նրանց մեջ ի հայտ է բերում հետաքրքրություններ, հաճախ հիացմունքի աստիճանի հասնող ուրախ զգացումներ, ցնծություն, երբեմն անգամ անհամեմատ չնչին առիթից, որը չի կարող համապատասխան զգացում առաջացնել մեծերի մոտ և անգամ բարձր դասարանցիների աշակերտների մեջ»<sup>2</sup>: Պատմվածքների դասավանդման ընթացքում երեխաները կարողանում են յուրացնել և ըմբռնել նաև բառերի, նախադասությունների և խոսքի ուղղակի և փոխաբերական իմաստները, այլաբանությունները, իրական և հավանական թվացող դեպքերը, գատել իրականն ու անիրականը:

Պատմվածքները հասանելի են կրտսեր դպրոցական տարիքի երեխաների համար. նրանք լավ յուրացնում են նաև ինչպես սյուժետային, այնպես էլ քնարական բնույթի ստեղծագործություններ: Սովորողները յուրացնում են գրական տարրական այնպիսի գիտելիքներ, ինչպիսիք են գրական հերոս, կերպար, սյուժե, գործողություն, դեպք, իմաստ և այլն:

«Կրտսեր դպրոցական տարիքում,- գրում է Վ. Ա. Կրուտեցկին,- դրվում են բարոյական վարքի հիմքերը, յուրացվում են բարոյական նորմերը և վարքի

<sup>1</sup> В. А. Крутецкий, Основы педагогической психологии, М., 1972, с. 42.

<sup>2</sup> Ф. Н. Гоноболин, Психология, М., 1973, с. 197-198.

կանոնները. սկսվում է ձևավորվել անձնավորության հասարակական ուղղվածությունը»<sup>3</sup>:

Այս շրջանում ձևավորվում են նաև գեղագիտական ըմբռնումներ, պատկերացումներ, իդեալներ: Այդ ամենն էլ անհրաժեշտ է հաշվի առնել կրտսեր կրտսեր դպրոցականի մտածողությունը ձևավորելու, զարգացնելու, աշակերտակենտրոն ուսուցում կազմակերպելու համար:

Պատմվածքների ուսումնասիրման գործընթացում մեծ է նաև հոգեբանության դերը: Յուրաքանչյուր մանկավարժ պետք է զինված լինի հոգեբանական գիտելիքներով: Տվյալ պարագայում հոգեբանությունը հնարավորություն է տալիս կազմակերպել փորձեր, դիտումներ, լաբորատոր և այլ միջոցներով պարզել երեխայի շատ հատկություններ հենց պատմվածքի ուսումնասիրման գործընթացում:

Ուսումնական գործունեության ընթացքում երեխաների մտավոր կարողությունների զարգացումը պետք է համապատասխանի նրանց բնականոն զարգացմանը: Դա նշանակում է, որ պետք է հաշվի առնել երեխաների տարիքային և անհատական առանձնահատկությունները, ուսուցանվող նյութի աստիճանական բարդացումը, մատչելիությունը, սխտեմատիկությունը ու հաջորդականությունը:

Որպեսզի դպրոցում պատմվածքների ուսումնասիրման ժամանակ տրված գիտելիքները երեխաների կողմից ըմբռնվեն խորությամբ, պետք է ընտրել ճիշտ ստեղծագործություններ, կարողանալ թափանցել սանի հոգու խորքերը, տեղյակ լինել տվյալ տարիքի երեխաների հետաքրքրություններից: Այդ ընթացքում կարևոր է զարգացնել երեխաների մտքի խորությունը, ճկունությունը, ինքնուրույնությունը, քննադատական կարողությունը և այլ դրական հատկություններ: Սակայն պետք է նկատել, որ անգամ վաղ տարիքից արտակարգ ընդունակություններ դրսևորած երեխաներն էլ իրենց հոգևոր աշխարհով մնում են որպես մանուկ, որպես երեխա՝ պահպանելով այդ տարիքին հատուկ խառնվածքն ու բնավորությունը:

Ն. Մենչինսկայան և Մ. Մորոն ուսումնարնկալման կարողությամբ աշակերտներին բաժանում են երկու հիմնական խմբի:

Մի խմբի երեխաները ուսումնատության ժամանակ աչքի են ընկնում արագ յուրացնելու, բարձր կարգի վերլուծություններ և համադրություններ կատարելու, ընդհանրացնելու կարողությամբ: Հաջորդ խմբի երեխաները աչքի են ընկնում

<sup>3</sup> Վ. Ա. Կրուտեցկի, Մանկավարժական հոգեբանության հիմունքները, Երևան, 1976:

դանդաղ մտածելու, նյութը դժվարությամբ յուրացնելու, ցածր կարգի վերացարկումներ, ընդհանրացումներ կատարելու հատկությամբ<sup>4</sup>:

Նրանք յուրացնում են փաստական նյութը, որոշ գիտելիքներ են ձեռք բերում, սակայն այդ երեխաների մեջ թույլ է ներքին մտավոր ակտիվությունը, վառ երևակայությունը, կուռ տրամաբանությունը և, ամենագլխավորը՝ նյութի ստեղծագործական վերամշակումը: Չնայած չի բացառվում նաև առանձին դեպքերում, դանդաղ մտածող երեխաների լավ սովորելը, մտքի վերացական-համադրական բարդ կարողությունները: Երեխան պատմվածքի դասավանդման ընթացքում կատարում է վերլուծություն, համադրություն, համեմատություն, համակարգում և դասակարգում, ինչպես նաև կատարում վերացարկում, ընդհանրացում, կոնկրետացում և այլն: Պատմվածքի դասավանդումը պետք է կատարել բարձր մակարդակով: Պետք է օգտագործել գեղարվեստական հարուստ խոսք, լեզվի պատկերավոր միջոցներ, բառապաշար, արտահայտչական միջոցներ, դիմախաղ, ինչպես նաև դիդակտիկ նյութեր և այլ ուսումնական պարագաներ: Պատմվածքի ուսուցման ընթացքում երկու կարգի վերլուծություն կարելի է կատարել՝ պրակտիկ և տրամաբանական: Պրակտիկ վերլուծությունների ժամանակ մասնատվում են իրական կոնկրետ իրեր և առարկաներ և զատ-զատ ուսումնասիրվում առանձին մասերի կազմությունը, դրանց գործնական նշանակությունը ամբողջի մեջ: Տրամաբանական վերլուծության ժամանակ մասնատումը, առանձնացումը կատարվում են մտովի, երևակայության ու պատկերացումների միջոցով: Երեխայի միտքը սովորաբար սկսում է վարժվել տարրական կարգի վերլուծությունների և աստիճանաբար հանգում բարդ վերլուծությանը: Տարրական դասարաններում նյութի վերլուծությունը կարելի է միանգամից խորությամբ չսկսել: Այն պետք է ունենա զարգացման տարբեր աստիճաններ: Պատմվածքի վերլուծության և առհասարակ վերլուծության ժամանակ Դյուին առանձնացնում է տրամաբանական հինգ կարևոր կետ՝

1. Խնդրի բարդության ըմբռնում
2. Խնդրի բնորոշում և սահմանազատում
3. Հնարավոր լուծումների պատկերացում

---

<sup>4</sup> Н. Менчинская и Моро, Вопросы методики и психологии, обучения арифметике в начальных классах, М., 1965, с. 188.

4. Դատողությունների միջոցով այդ պատկերացումների զարգացում

5. Համապատասխան եզրակացությունների հանգում<sup>5</sup>:

Վերլուծությունը այն հետազոտական եղանակն է, առանց որի չեն կարող զարգանալ մտածողության գործընթացի հետագա աստիճանները՝ համադրությունը, վերացարկումը, ընդհանրացումը, կոնկրետացումը և այլն: Վերացարկումը իմացության ձև է, որը հնարավորություն է տալիս ամբողջից մտովի անջատել նրա որևէ հատկությունը, որևէ կողմը և այն հետազոտել մեկուսացված պայմաններում: Մերժելի է մանկավարժության մեջ տեղ գտած այն կարծիքը, թե ուսման առաջին տարում չպետք է աշակերտներին տրվեն լուրջ, վերացական ու մտքի լարում պահանջող աշխատանքներ, որ ուսումը այդ շրջանում ավելի շատ պետք է հաճույք ու զվարճանք թվա: Իրականության արտացոլման և մտավոր գործունեության անհարժեշտ ձևերից են նաև ընդհանրացումն ու կոնկրետացումը: Վերջիններս տեղի են ունենում վերացարկումների միջոցով:

Ընդհանրացումները երեխաների մոտ հանդես են գալիս, որպես մտավոր գործունեության վերջնարդյունք և մտքերի համագումար: Նյութերն այնպես պետք է դասավորել, որ դրանք փոխադարձաբար լրացնեն իրար, երեխային կռահելու, դատելու, խնդիրներ առաջադրելու ազատ հնարավորություններ տան:

Նույն կերպ պետք է վարվել դասանյութը մասերի բաժանելու, պլաններ կազմելու, առաջադրանքներ մշակելու և այլ դեպքերում: Այնուհետև ընդհանրացման հետ մեկտեղ տեղի է ունենում կոնկրետացումը:

---

<sup>5</sup> Ст' у Дж. Дьюи, Психология и педагогика мышления, М., 1915, с. 63.

## ԳԼՈՒԽ ԵՐԿՐՈՐԴ: ՊԱՏՄՎԱԾՔԻ ՈՒՍՈՒՄՆԱՍԻՐՄԱՆ ՄԵՐ ՓՈՐՁԻՑ

Որպեսզի պատմվածքի ուսումնասիրումն առավել արդյունավետ լինի, հարկավոր է պատասխանել հետևյալ հարցերին՝

- Գիտելիքների ինչպիսի՞ նախնական պաշար ունեն աշակերտները:
- Որքա՞ն է աշակերտների ընդհանուր թվաքանակը դասարանում:
- Որքա՞ն է հատկացված ժամաքանակը:
- Ինչպե՞ս կառուցել դասը, որ այն ընդգրկի ամբողջ նյութը և աշակերտներին ստիպի ինքնուրույն մտածել:
- Ինչպիսի՞ մեթոդներ կիրառել դասի ընթացքում:
- Դասարանը բաժանել խմբերի, թե՞ ոչ:
- Ինչպիսի՞ դիդակտիկ նյութեր օգտագործել:
- Ի՞նչ առաջադրանքներ կատարել դասարանում:
- Ի՞նչ առաջադրանքներ հանձնարարել տանը կատարելու համար և այլն:

Դասի ամենօրյա պլանավորումը դասի արդյունավետության հետ կապված մտահղացումների արդյունավետ իրագործման հրամայականն է:

Դասի պլանավորման բաղադրիչներն են՝

- Դասի թեման:
- Դասի նպատակները՝ կրթական, զարգացնող, դաստիարակչական...
- Դասի տեսակը՝ նոր նյութի յուրացման, ամրապնդման, գիտելիքների, կարողությունների և հմտությունների ստուգման, յուրացված նյութի համակարգման և ընդհանրացման:
- Դասի հիմնական փուլերին հատկացվող ժամանակի բաշխում:
- Դասի ընթացքը:
- Դասի հենքային հասկացությունների ձևավորման փուլերը:
- Դասավանդման մեթոդները՝ բանավոր, անհատական, համընդհանուր կամ զրույցի տարրերով պատմվածք:

Դասի պլանավորման համար կարելի է կիրառել դասի հետևյալ կառուցվածքային միավորները՝

- Դասի սկզբի կազմակերպում:
- Գիտելիքների, կարողությունների և հմտությունների բացահայտում:
- Աշխատանք ուսումնասիրվող նյութի հետ:

- Ծանոթացում նոր նյութի հետ:
- Գիտելիքների պլանավորված մակարդակի ապահովում՝ կրկնություն, կատարելագործում և գիտելիքների ու կարողությունների կիրառում:
- Գիտելիքների համակարգում և ընդհանրացում: Տնային աշխատանքի կազմակերպում

Դասի պլանն անհրաժեշտ է կազմել այնպես, որ ուսուցման պլանավորվող արդյունքները շոշափելի ազդեցություն ունենան ուսուցման որակի բարձրացման վրա առավել արդյունավետ իրացնեն ուսումնական ծրագրի հնարավորությունները: Դրա համար դասի պլանավորվող արդյունքները պետք է բավարարեն հետևյալ պահանջներին՝ լինեն հստակ, իրական և բաց, այսինքն աշակերտը պետք է հասկանա՝ ինչ են իրենից պահանջում և ինչպես այն կատարել:

Դասի պլան կազմելիս խորհուրդ է տրվում առանձնացնել ուղղություններ՝ «Դասի կառուցվածքային տարրեր», «Ուսուցչի գործունեություն», «Աշակերտի գործունեություն»: Յուրաքանչյուր դասի պլան պետք է հանգամանորեն մշակել, կցել այդ պլանին համապատասխան դիդակտիկ նյութ, սահմանել առաջադրանքների չափանիշներ: Անհրաժեշտ է նշել ուսուցման ձևեր և մեթոդները, ուսուցման գործընթացի կազմակերպման ձևերը, ստուգման ձևերը և միջոցները:

Դասի տիպերը՝

Դասը դասակարգվում է ըստ դիդակտիկ նպատակների, գիտելիքների, կազմակերպման նպատակների, դասի անցկացման միջոցների և բովանդակության, ուսումնական գործընթացի հիմնական փուլերի, դասի ընթացքում լուծվող դիդակտիկ խնդիրների, դասավանդման մեթոդների և սովորողների կրթական գործընթացի կազմակերպման միջոցների: Դասի ոչ ավանդական ձևերն են՝

- դերային խաղեր,
- դաս-ներկայացում,
- մտապատկերների դաս,
- գործարար խաղ,
- դաս-մրցույթ,
- ստեղծագործական դաս և այն: Թեման՝ Ճուտիկը

Նպատակը՝ զարգացնել երեխաների մտածողությունը, բոլոր զգայարանները, հարստացնել բռնապաշարը մի շարք նորաձևնոթ բառերով, տեղեկություն տալ

պատմվածքում առկա կենդանիների մասին:

Դասի ընթացքը՝

Խթանման փուլում. Առաջադրել հետևյալ հարցերը՝

- դուք սիրո՞ւմ եք կենդանիներ,
- ով, ինչ կենդանի է սիրում,
- պահո՞ւմ եք կենդանիներ,
- ինչպե՞ս եք վարվում կենդանիների հետ:


Իմաստի ընկալման փուլում կարդալ պատմվածքը, քննարկել:

Քննարկումն իրականացնել մտազրոհի մեթոդով՝ պարզելու, թե աշակերտները որքանո՞վ յուրացրին նյութը: Երեխաները մտազրոհի ժամանակ ճիշտ կողմնորոշվեցին և կարողացան նկարագրել ճուտիկին:

Այնուհետև աշակերտները քննարկեցին, թե ու՞մ էր ուզում նմանվել ճուտիկը և ինչո՞ւ էր ծիծաղում գորտը:

Այդ ամենից հետո երեխաները 5-րուպեանոց շարադրանքի միջոցով իր գույգի (կողքի նստած աշակերտի) հետ միասին թղթի վրա նշեցին հանդիպած կենդանիների անունները՝ ընդգծելով նրանց արձակած ձայները:

Որոշ աշակերտներ խառնել էին ձայները, բայց մեկը մյուսին ուղղելով՝ աշակերտները ճշտեցին սխալները:



Կշռադատման փուլում իրականացրինք քառաբաժան մեթոդը:


<p>Ի՞նչ կենդանիների հանդիպեցինք Ճուտիկ, հավիկ, փիսիկ, աքլոր, գորտ</p>	<p>Ի՞նչ ձայներ էին արձակում Ծվծվում էր, կչկչում էր, մլավում էր, ծուղրուղու էր կանչում, կռկռում էր</p>
<p>Ի՞նչ գույներ կամ գունանունների ունեին Դեղին, կարմիր, նարնջագույն, մոխրագույն, սև, կանաչ</p>	<p>Ի՞նչ հասկացանք Ճուտիկը մեծամիտ էր և ուզում էր նմանվել մյուս կենդանիներին: Իմացանք նաև, որ ինչպես բոլոր կենդանիները, այնպես էլ՝ պատմվածքի կենդանիները ունեն տարբեր գույներ, արձակում են տարբեր ձայներ:</p>

Աշակերտները ծանոթացան պատմվածքի կենդանիներին, տարբերակեցին նրանց գույները, արձակած ձայները, որը նպաստեց նրանց զգայարանների զարգացմանը,




հարստացավ նրանց բառապաշարը, տեղեկություններ ստացան շրջապատող կենդանիների, նրանց վարքագծի մասին: Սեր արթնացավ կենդանիների հանդեպ:

## Ըստ ստատիստիկ տվյալների դասգրքում գերիշխում են պատմվածքները



Հարցումներից պարզ դարձավ, որ աշակերտները ավելի շատ սիրում են պատմվածքներ ընթերցել



## ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Բալյան Ա., Մանկավարժական հոգեբանության հարցեր, Երևան, 1983:
2. Գալստյան Ա., Խարազյան Ռ., Ավագյան Լ., Բալայան Ա., Ինքնուրույն ընթերցանության նյութեր 2, Երևան, Էդիթ Պրինտ, 2010:
3. Գյուլամիրյան Ջ., Մայրենիի տարրական ուսուցման մեթոդիկա, Երևան, Լույս, 2015:
4. Էլկոնին Դ. Բ., Կրտսեր դպրոցականի ուսուցման հոգեբանություն, Երևան, Լույս, 1975:
5. Խուդոյան Ս., Անձի զարգացման ճգնաժամային տարիքը, Երևան, Զանգակ-97, 2004:
6. Կրուտեցկի Վ. Ա., Մանկավարժական հոգեբանության հիմունքներ, Երևան, Լույս, 1976:
7. Տարիքային և մանկավարժական հոգեբանություն: Ուսումնական ձեռնարկ, խմբ.՝ Ա. Պետրովսկի, Երևան, Լույս, 1977: